

Garantia di depósito na Hulanda Karibense

For di òktober 2017, e Sistema pa Garantia di depósito pa Hulanda Karibense ta protehá habitantenan di e entidatnan pùbliko Boneiru, Sint Eustatius i Saba. Garantia di depósito ta un protekshon gràtis ku kua, den kasu ku algu sosodé ku un banko, ta outomàtikamente protehá depósito (di spar) di e klientenan di un banko di un sèn di dòler te un màksimo di 25.000 USD. De Nederlandsche Bank (DNB) ta ehekutá e Sistema pa garantia di depósito pa Hulanda Karibense. E factsheet akí ta duna un bista di e kobertura ku e garantia di depósito ta ofresé i ta splika tambe kon e protekshon ta funshoná.

Kontrolá bo protekshon den 2 stap

Dor di kontestá e siguiente dos preguntanan, bo por husga rápidamente si abo, bo empresa òf un otro hende ta protehá pa e garantia di depósito pa Hulanda Karibense.

1. Abo, òf bo empresa, tin sèn riba un kuenta di banko na un ofisina na Boneiru, Sint Eustatius òf Saba di un banko ku ta kai bou di garantia di depósito pa Hulanda Karibense? (mira sekshon 1)

Nò

Sí

2. Abo, òf bo empresa, ta ofisialmente registrá na e banko como (ko-)proprietario di e kuenta(nan) di banko riba kua bo sèn ta reservá?* (mira sekshon 2)

Nò

Sí

[Si bo kontestá dos biaha sí] Bo por ta kasi sigur ku bo sèn, of sèn di bo empresa, ta protehá te un màksimo di 25.000 USD pa persona òf empresa, pa banko. Sierito eksepshon ta aplikabel. (mira sekshon 3)

[Si bo kontestá 1-2 biaha nò] Bo sèn, òf sèn di bo empresa, probablemente no ta protehá pa e garantia di depósito.

* Si bo kontesta riba pregunta 2 ta 'nò', den un kantitat chikí di kasu ta posibel ku tòg bo ta protehá pa e garantia di depósito. Esaki ta e kasu ora tin un kuenta di tercer partido reservá na bo fabor. Den sekshon 2 bo por lesa mas tokante e situashon spesífiko aki.

Por t'asina ku den algun kasu limitá bo ta eksklúi tòg for di e garantia di depósito. Esaki ta e kasu por ehèmpel si ta trata di un empresa finansiero. Den sekshon 2 i den e anekso bo ta lesa mas tokante e situashonnan spesífiko aki.

Kiko ta kai bou di protekshon di e garantia di depósito?

E garantia di depósito ta garantisá e sèn ku doñonan(nan) di kuenta di banko tin reservá serka bankonan ku un ofisina na un di e entidatnan público Boneiru, Sint Eustatius i Saba ku tin un pèrmit di De Nederlandsche Bank pa ta aktivo riba e islana akí. Un depósito ta sèn ku tin reservá riba kuentanan bankario manera kuentanan di pago, kuentanan di spar i depósitonan na térmico. Si un banko ku ta kai bou di e efekto protektor di e garantia di depósito, bai fayit, De Nederlandsche Bank lo ofresé un kompensashon na e propietarionan di kuenta ku ta bin na remarke pa garantia di depósito. E kompensashon ta un máksimo di e límite di kobertura di 25.000 USD pa persona pa banko.

E protekshon ta konta solamente pa sèn ku tin na un banko. Esaki ta nifiká ku e garantia di depósito no ta konta pa asosiashonnan di krédito. Riba wèpsait di DNB pa Hulanda Karibense (www.dnb.nl/caribisch-nederland) tin un registro kaminda por mira tur banko ku tin un pèrmit. Ku e registro akí bo por kontrolá si di bèrdat un banko ta kai bou di e garantia di depósito.

Mayoria banko na Hulanda Karibense ta aktivo tambe riba e otro islana manera Aruba, Kòrsou i Sint Maarten. Den un kaso asina, e garantia di depósito di Hulanda Karibense ta konta solamente pa sèn ku tin reservá na ofisinanan di e bankonan akí na Hulanda Karibense, esta na Boneiru, Sint Eustatius òf Saba. P'esei ta konsehabel como cliente di un banko pa bo kontrolá semper si bo sèn ta reservá na un ofisina bankario na Boneiru, Sint Eustatius òf Saba.

Pa kua banko, e garantia di depósito ta konta?



Riba 1 di novèmber 2018, e siguiente bankonan tin un pèrmit di De Nederlandsche Bank pa ofresé servisionan na Hulanda Karibense. P'esei e sèn ku tin reservá na ofisinanan di e bankonan akí na Boneiru, Sint Eustatius i Saba ta bini na remarke pa e garantia di depósito*:

- Banco Di Caribe N.V.
- Maduro & Curiel's Bank (Boneiru) N.V.
- Orco Bank N.V.
- RBC Royal Bank N.V.

Por tin kambionan den e lista di banko ku e garantia di depósito ta konta p'e. Esaki por ta e kaso, por ehèmpel ora un banko nobo risibí un pèrmit pa ta aktivo na Hulanda Karibense. Den kaso di duda ta rekomendabel pa chèk serka bo banko si bo sèn ta protehá pa e garantia di depósito. Semper e wèpsait di DNB pa Hulanda Karibense lo ofresé un bista aktualisá di e bankonan ku e garantia di depósito ta konta p'e.

* Na momentu ku a skibi e 'factsheet' akí, First Caribbean International Bank (Cayman) Ltd. i PSB Bank N.V. tambe tabatin un pèrmit pa ofresé servisio como banko na Hulanda Karibense. Sinembargo pa motibu ku tur dos banko na e momentunan ei no tabatin ofisina na Boneiru, Sint Eustatius òf Saba, e sèn ku tin reservá na e bankonan akí no ta bin na remarke pa e garantia di depósito pa Hulanda Karibense.

Ken ta kai bou di protekshon di e garantia di depósito?

Den sentido general t'asina ku propietarionan di kuenta serka bankonan di e entidatnan público Boneiru, Sint Eustatius i Saba ta protehá pa e garantia di depósito pa sèn ku nan tin reservá serka bankonan ku tin un pèrmit di De Nederlandsche Bank pa ta aktivo riba e islana akí. E protekshon ta konta tambe pa kuentanan bankario di empresanan.

Sierdo doño di kuenta ta ekskluí for di e garantia di depósito. Saldonan bankario di empresanan finansiero i gobièrnunan por ehèmpel ta ekskluí for di e garantia di depósito. E anekso ta kontené un bista kompletu ku eksklushonnan.

Den sierdo caso por t'asina ku un doño di kuenta tin sèn reservá na benefisio di un òf mas otro persona òf empresa.

Ta yama esaki tambe kuenta di terser partido. Si un kuenta di terser partido asina ta kumpli ku algun kondishon, e otro persona òf empresa ei lo ta protehá pa e garantia di depósito. Esaki suponiendo ku e otro persona òf empresa akí no ta ekskluí for di garantia di depósito.¹ Den caso di un kuenta di terser partido, lo agregá e sèn ku ta korespondé na un otro persona òf empresa na otro depósitonan di e terser persona òf empresa akí na e mesun banko.

Den caso ku un kuenta bankario ta na nòmber di un yu menor di edat, e yu akí lo ta esun ku e efekto protektor di e garantia di depósito ta konta p'e. Ke men e protekshon akí no ta konta pa e mayornan (òf representantenan) ku por aktua na nòmber di e yu.

¹ E kondishonnan ku mester kumpli kuné pa laga e kobertura konta pa otro persona òf empresa ta lo siguiente: Na promé lugá mester tin e kuenta bankario en kestion reservá a base di stipulashonnan legal òf kontraktual ku tabata konta kaba promé ku e sistema pa garantia di depósito a drenta na vigor (Nota: esaki ta e momentu ku ta hasi un apelashon riba e garantia di depósito den caso, por ehèmpel, di baimentu fayit di un banko). Na di dos lugá, identitat di e otro persona- òf empresanan mester ta konosí na banko òf mester por determiná esaki na man di un administrashon profesional realisá pa e doño di kuenta. Na di tres lugá, mester por fiha nivel di e depósitonan a base di datonan fihá promé ku e sistema pa garantia di depósito drenta na vigor.

Ki ta e nivel di protekshon bou di e garantia di depósito?

Sèn ku tin reservá riba kuentanan bankario (depósito) ta risibí protekshon di un sèn di dòler te un máksimo di 25.000 USD pa persona òf empresa, pa banko. E banko akí mester tin un pèrmit pa por ta aktivo via un ofisina di banko na Boneiru, Sint Eustatius i Saba. Tin dos regla importante pa kòrda tokante e límite di kobertura di e garantia di depósito.

Regla 1: E protekshon ta konta pa persona òf empresa, no pa kuenta

E regla akí ta nifiká ku si un persona òf empresa tin mas ku un kuenta na un banko, e límite di kobertura ta konta pa e montante total di tur kuenta ku e persona òf empresa akí tin reservá na e banko. E regla ta nifiká tambe ku den caso di un kuenta kompartí, e límite di kobertura ta konta pa kada doño di kuenta separá. Ke men, den caso, por ehèmpel ku bo tin un kuenta bankario kompartí ku bo partner, i niun di dos persona no tin otro kuenta na e banko akí, boso tur dos ta protehá pa e garantia di depósito te un máksimo di 25.000 USD. Si e banko bai fayit, lo bo risibí pa e kuenta kompartí akí un kompensashon di un máksimo di 50.000 USD serka De Nederlandsche Bank.

Regla 2: E protekshon ta konta pa banko (ku un pèrmit di De Nederlandsche Bank)

Esaki ta importante pasó por ta ku un persona òf empresa tin kuentanan na diferente banko. E ora ei e persona- i empresanan akí ta protehá pa kada banko apart te e límite di kobertura di 25.000 USD.² Den sentido general t'asina ku ta konsehá persona- i empresanan pa kontrolá si e sèn ku nan tin reservá riba nan kuenta bankario serka un sierto banko ta mas ku 25.000 USD. Si esaki enbèrdat ta e kasos, e persona òf empresa akí lo por repartí e sèn na diferente banko pa oumentá e protekshon bou di e garantia di depósito.

² Ounke aktualmente esaki no ta e kasos na Boneiru, Sint Eustatius i Saba, un banko por ta aktivo bou di diferente marka òf nòmber (komersial) ku ta kai bou di e mesun pèrmit bankario. Den tal kasos, e persona- i empresanan ku tin diferente kuenta serka diferente marka òf nòmber (komersial) pa e kuentanan akí ta konhundamente garantísá pa risibí un máksimo di USD 25.000. Den kasos di duda ta rekomendá doñonan di kuenta pa tuma kontakto ku nan banko pa puntra si un banko tin diferente marka òf nòmber (komersial) bou di e mesun pèrmit bankario.

Ehèmpelnan di kalkulashon di e suma garantisá

Ehèmpel 1



- Persona A tin dos kuenta serka ABC Bank: un kuenta koriente ku un saldo di 10.000 USD i un kuenta di spar ku un saldo di 17.000 USD. Pa kalkulá e suma ku ta kai bou di protekshon di e garantia di depósito mester konta e saldo riba tur dos kuenta huntu. E saldo konhunto akí ta garantisá te e límite di kobertura. Huntu e dos kuentanan di persona A tin un saldo di 27.000 USD. E saldo te 25.000 USD ta kai bou di protekshon di e garantia di depósito. Esaki ta nifiká ku 2.000 USD no ta kai bou di protekshon di e garantia de depósito.

Ehèmpel 2



- Persona B tin un kuenta koriente serka ABC Bank. E saldo riba e kuenta akí ta 15.000 USD. Persona B tin un kuenta di spar tambe serka XYZ Bank. E saldo riba e kuenta aki tambe ta 15.000 USD. Konhumente e saldo riba e kuentanan aki tambe ta 30.000 USD. Sinembargo, e suma kompletu ta protehá pasó e sèn ta repartí den dos banko. Si algu mester sosedé ku tanto ABC Bank como XYZ Bank, persona B lo risibí un kompensashon di 30.000 USD serka De Nederlandsche Bank a base di e garantia di depósito.

Ehèmpel 3



- Personanan C i D tin un kuenta koriente kompartí serka ABC Bank i a chèk si e kuenta ta registrá riba nan tur dos su nòmber ("Persona C i/òf Persona D"). E kuenta koriente tin un saldo di 30.000 USD. Persona C i D tur dos ta pa 50% doño di e kuenta koriente i no tin otro kuenta serka ABC Bank. Pa kalkulá e suma ku ta kai bou di protekshon di garantia di depósito, mester fiha kada persona su parti den e kuenta bankario promé. Den mayoria kasos ta papia di un repartishon igual entre e doñonan di kuenta. Den kasos di personanan C i D tambe esaki ta e kasos. Pa tur dos persona, e suma ku ta mantené serka ABC Bank (esta 15.000 USD pa persona) ta mas abou ku e límite di kobertura. Ke men e saldo total de 30.000 USD ta kai bou di protekshon kompletu di e garantia de depósito.

Kiko ta sosedé si mi banko bai fayit?

Si un banko, dor di un veredikto di un hues, no ta kapas mas pa duna bék na su klientenan e sèn ku tin riba kuenta (depósito), De Nederlandsche Bank ta legalmente obligá pa aktivá e sistema pa garantia di depósito pa Hulanda Karibense inmediatamente. Esaki por ehèmpel ta e caso ora deklará un banko fayit. De Nederlandsche Bank mes tambe, sin veredikto di un hues, por deklará ku un banko no ta kapas mas pa duna bék na su klientenan e sèn ku tin riba kuentanan. Den e caso ei De Nederlandsche Bank tin e obligashon pa aktivá e garantia di depósito denter di 21 dia despues ku e depósitonan pa di promé biaha no tabata disponibel mas. Despues ku De Nederlandsche Bank a aktivá e sistema pa garantia di depósito pa un banko, lo anunsiá esaki den medionan di komunikashon lokal i riba e wèpsait di De Nederlandsche Bank.

Den e notifikashon, De Nederlandsche Bank lo indiká kon klientenan perhudiká por hasi un petishon pa nan kompensashon. Den mayoria kaso esaki lo nifiká ku De Nederlandsche Bank lo habri un ofisina na e

islanan kaminda e banko ku a bai fayit tabata aktivo ku su ofisinanan. E ora ei e klientenan di e banko ku a bai fayit por bai na e ofisina akí pa hasi pregunta i pa hasi un petishon pa e kompensashon (na papiamentu, hulandes i inglés).

Despues ku risibí i aprobá e petishon, De Nederlandsche Bank lo disidí mas pronto posibel riba e kompensashon i pone esaki disponibel. E término máksimo denter di kual De Nederlandsche Bank mester hasi esaki ta 20 dia di trabou despues ku a hasi un petishon. E cliente di un banko ku a hasi un petishon lo risibí un karta di De Nederlandsche Bank e ora ei. E karta akí ta duna un splikashon di e desishon i ta informá tokante e manera ku e cliente di un banko lo risibí e kompensashon. Den mayoria kaso, pago lo tuma lugá pa medio di transferensia pa un otro kuenta bankario – eksistente òf un nobo ku a habri – di e petishonario. Si no ta posibel pa e cliente di un banko pa habri un kuenta nobo (rápidamente), ta posibel pa hasi pago kesh.

E tareanan di De Nederlandsche Bank na Hulanda Karibense



De Nederlandsche Bank no ta solamente responsabel pa ehekushon di e garantia di depósito na Boneiru, Sint Eustatius i Saba. Otro tareanan di De Nederlandsche Bank na Hulanda Karibense ta trata e operashon di pago i supervishon di empresan finansiero ku ta aktivo na Hulanda Karibense.

Ken ta paga pa e garantia di depósito?

E protekshon pa e garantia di depósito ta grátis pa klientenan di un banko. Den kasu ku mester realmente aktivá e sistema pa garantia di depósito, por ehèmpel pa motibu di bai fayit di un banko, e gastunan di pago finalmente lo ta pa kuenta di e otro bankonan ku ta protehá pa e garantia di depósito pa Hulanda Karibense.

Pa hasi esaki, for di promé di yanüari 2025 lo konstruí un fondo den kua e bankonan en kestion kada aña por depositá un suma. E grandura di e fondo di garantía di depósito ta 5% di e basenan di depósito di e bankonan riba kua e fondo di garantia di depósito ta aplikabel. Pero pa sòru pa e klientenan di un banko haña nan kompensashon mas rápido posibel, i ora e fondo (ainda) no ta suficientemente yená, gobièrnu hulandes ta paga e kompensashonnan adelantá.³

Mas informashon



Si bo tin mas pregunta tokante e garantia di depósito pa Hulanda Karibense òf si bo tin mester di mas informashon, bo por meil òf bèl Informashon Pùblico di De Nederlandsche Bank (na hulandes i ingles). Konsumidónan, banko - i otro institushonnan por hasi uzo di e siguiente datanon di kontakto pa alkansá e bali di Informashon.

- www.dnb.nl/caribisch-nederland
- info@dnb.nl
- Informashon Pùblico ta ubiká na Amsterdam, Hulanda. For di Hulanda Karibense por bèl +31 20 524 91 11 (number internashonal). Riba dianan di trabou por alkansá Informashon Pùblico entre 9 or di mainta i 5 or di atardi (Ora Sentral Oropeo / Ora di zomer Sentral Oropeo).

³ Despues di paga un kompensashon, De Nederlandsche Bank ta drenta den e demanda ku un doño di depósito tin riba e banko ku a bai fayit (pa e porshon pa kua e sistema di garantia di depósito a paga un kompensashon). Esaki ta un stipulashon tékniko ku ta hasi posibel pa De Nederlandsche Bank kompensá, parsialmente òf kompletamente, e finansiamentu ku gobièrnu hulandes i e bankonan a suministrá.

Anekso: Eksepshonnan riba kobertura pa e garantia de depósito

Sierito persona, empresa- i institushonnan ta ekskluí for di e garantia di depósito. Meskos ta konta pa sierito depósito. Tabèl 1 ta duna un bista kompletu di

e klientenan di banko i depósitonan ku e garantia di depósito no ta konta p'e.

Tabèl 1: Bista di eksepshonnan riba kobertura pa garantia di depósito

Tenedó di depósito

E garantia di depósito pa Hulana Karibense no ta konta pa e siguiente klientenan di un banko:

- Empresanan finansiero.
- Gobièrnunan sentral, regional i lokal òf personanan hurídiko establesé bou di lei públiko.
- Personanan hurídiko ku ta forma parti di e mesun grupo ku e institushon di krédito ku ta faya ku pago ta pertenesé na dje.
- Administradónan di bankonan ku ta faya ku pago òf personanan hurídiko ku ta forma parti di e mesun grupo (i nan kasánan, partnernan registrá i yunan menor di edat).
- Miembroran di e órgano ku denter di e banko ku ta faya ku pago (òf personanan hurídiko ku ta forma parti di e mesun grupo) ta enkargá ku supervishon riba e maneho i e manera general ku kosnan ta kana denter di e empresa (i nan kasánan, partnernan registrá i yunan menor di edat).
- Personanan (i nan kasánan, partnernan registrá i yunan menor di edat) ku tin un partisipashon di por lo ménos dies porshento den kapital di e banko ku ta faya ku pago di kompensashon (òf personanan hurídiko ku ta forma parti di e mesun grupo).

Depósitonan

E garantia di depósito pa Hulana Karibense no ta konta pa e siguiente depósitonan:

- Depósitonan reservá serka un establecimiento pafó di e entidatnan públiko Boneiru, Sint Eustatius òf Saba.
- Depósitonan pa kua e creditor di e banko ku ta faya ku pago a risibí tarifanan di interes òf benefisionan finansiero di tal magnitud ku esakinan a kontribuí na e banko su fayo pa cumpli ku pago.
- Depósitonan relashoná ku transakshonnan pa kua a dikta un kondena penal pa motibu di labamentu di plaka òf finansiamentu di terorismo.
- Garantia di depósito no ta konta tampoco pa debenan ku ta resultá for di aseptashonnan òf promesanan di pago di e banko ku ta faya ku pago.

Disclaimer:

E 'factsheet' akí tokante Garantia di depósito na Hulanda Karibense ta intentá na duna un deskripshon kompletu di e sistema pa garantia di depósito pa Hulanda Karibense. Sinembargo, e 'factsheet' no ta intenshoná como un splikashon hurídiko di legislashon- i regulashonnan ku ta fungi como guia pa e garantia di depósito. Pa regulashonnan eksakto ku ta forma base di e garantia di depósito pa Hulanda Karibense, bo por konsultá e artíkulonan tokante e sistema pa garantia di depósito den Lei Merkadonan Finansiero Islanan BES i Dekreto Merkadonan Finansiero Islanan BES. E informashon den e 'factsheet' akí ta basá riba e legislashon- i regulashonnan manera esakinan tabata aplikabel for di yanüari 2025. Ta posibel sinembargo ku a kambia e legislashon- i regulashonnan despues, loke ta hasi e informashon den e 'factsheet' antikuá. Pa haña un bista di e regulashonnan aktual i e kobertura ku ta resultá for di esaki bou di e garantia di depósito, lo bo por konsultá e wèpsait di DNB pa Hulada Karibense tur ora bai (www.dnb.nl/caribisch-nederland).